

四庫全書薈要

• 乾隆御覽本

集部

欽定四庫全書薈要

集部

遺山集卷九

十九

詳校官助教臣謝登雋



遺山集卷九

金 元好問 撰

七言律詩

望崧少二首

崧少飛來崑閬山
山家茅屋翠微間
雞豚鄉社相勞苦
花木禪房時往還
結習尚餘三宿戀
殘年多負半生閒
長河一葦人千里
望斷西城碧玉環

飲鶴池邊萬木稠，養龍崖上五峯秋。
藤垂絕壁雲添潤，澗落哀湍雪共流。
田父占年驚玉斂，詩仙留迹歎崑丘。
西風落日山陽道，空對紅塵憶舊遊。

飲鶴池在五乳山下，養龍崖在五乳峯下。

懷州子城晚望少室

河外青山展卧屏，并州孤客倚高城。
十年舊隱拋何處，一片傷心畫不成。
谷口暮雲知鄭重，林梢殘照故分明。
洛陽見說兵猶滿，半夜悲歌意未平。

別覃懷幕府諸君二首

王後盧前舊往還江東渭北此追攀
百年人物存公論四海虛名只汗顏
詩酒聊堪慰華髮茅終擬共青山
相思後日并州夢常在瑤林照映間

太行釀秀在山陽嵇阮經行舊有鄉林影
池煙設清供物華天寶借餘光承平故事嗟
猶在雅詠風流豈易忘稍待秋風入涼冷
百壺吾欲醉籌堂

河內有七賢鄉

羊腸坂

浩蕩雲山直北看凌兢羸馬不勝鞍
老來行路先愁遠

貧裏辭家更覺難
衣上風沙歎憔悴
夢中燈火憶團圓
憑誰為報東州信
今在羊腸百八盤

高平道中望陵川二首

此縣先隴城府
君太和中舊治

列宿澄明墨綬尊
中臺良選到名門
來時珥筆誇健訟
去日攀車餘淚痕
一片青山幾今昔
百年華屋記生存
泰和遺老今誰在
向道甘棠有子孫

鈴閣文書到酒卮
諸曹小吏亦抄詩
座中佳客無虛日
簾下歌童盡雅辭
棠棣有花移舊巧
櫻桃和露彈繁枝

書郎零落頭今白腸斷荷衣出拜時

棠棣櫻桃
皆當時事

野谷道中懷昭禪師

行行汾沁欲分疆
漸喜人聲挾兩鄉
野谷青山空自繞
金城白塔已相望
湯翻豆餅銀絲滑
油點茶心雪蘂香
說向阿師應被笑
人生生處果難忘

太原

夢裏鄉關春復秋
眼明今得見并州
古來全晉非無策
亂後清汾空自流
南渡衣冠幾人在
西山薇蕨此生休

金匱四庫全書
卷九
十年弄筆文昌府，爭信中朝有楚囚。

外家南寺

在至孝社子兒時讀書處也

鬱鬱秋梧動晚煙，一庭風露覺秋偏。
眼中高岸移深谷，愁裏殘陽更亂蟬。
去國衣冠有今日，外家梨栗記當年。
白頭來往人間徧，依舊僧窗借榻眠。

追賦定襄周帥夢卿家秋日牡丹

千古吳中富貴家，秋風吹送洛陽花。
真妃鏡裏春難老，玉女車邊日易斜。
紀瑞定誰增舊譜，換根元自有靈砂。

來遲不及西堂宴猶想分香入棣華

周有棣
華堂

桐川與仁卿飲

瀟瀟茅屋繞清灣四面雲開碧玉環已分故人成死別
寧知尊酒對生還風流豈落正始後詩卷長留天地間
海內斯文君未老不須辛苦賦囚山

過濁鹿城與趙尚賓談山陽舊事

廢邑蕭條落照邊山陽遺迹世空傳肺腸未潰猶可活
灰土已寒寧復然負鼎運來元有力考槃人去更堪憐

因君憶得曹瞞事銅雀臺荒又幾年

官園探梅同康顯之賦

柳麥榆椒寂寞邊儘饒梅事得春偏留殘瘦骨猶堪畫
未展幽香已可憐千里移根自何許數枝臨水記當年
開時重約花前醉試手東風第一篇

十二月十六日還冠氏十八日夜雪

少日騫飛掣臂鷹只今癡鈍似秋蠅耽書業力貧猶在
涉世筋骸老不勝千里關河高骨馬四更風雪短檠燈

一餅一鉢平生了，慚愧南窗打睡僧。

別康顯之

玉川文字五千卷，鄭監才名四十年。
誰謂華高吾豈敢，恥居王後子當然。
河亭笑語歸陳迹，里社追隨失後緣。
後夜并州月千里，南窗尊酒且留連。

寄楊飛卿

客夢悠悠信轉蓬，
蓀床殷殷動晨鐘。
西風白髮三千丈，
故國青山一萬重。
沙水有情留過鴈，
乾坤多事泣秋蟲。

三間老屋知何處
慚愧雲間陸士龍

雨夜

夢裏孤蓬雨打秋
茅齋元更小於舟
無錢正坐詩作祟
識字重為時所讎
千里謾思黃鵠舉
六年真作賈胡留
并州北望山無數
一夜砧聲人白頭

東平送張聖與北行

天山曾望使車還
官柳青青此重攀
去國衣冠元易感
中年親友更相關
蒲雲自可無千里
隱霧難教見一班

海內文章在公等不應空老道途間

別張御史

特立字
文舉

晚學天教及老成翰林詩裏羨鴻冥

馮內翰父贈御史
詩有鴻冥雖媒之

句 簞瓢此日歸顏巷銅墨當時動漢庭
華袞謾勞紆直

筆

御史見貽之
行過有褒拂

絳帷無復與橫經祇應千里并州道常

並虛危候德星

出東平

老馬凌兢引席車高城回首一長嗟
市聲浩浩如欲沸

世路悠悠殊未涯
潦倒本無明日計
往來空置六年家
東園花柳西湖水
剩著新詩到處誇

再到新衛

蝗旱相仍歲已荒
伶俜十口值還鄉
空令姓字喧時輩
不救飢寒趨路傍
行帳馬嘶塵瀕洞
空村人去雨淋浪
河平千里筋骸盡
更欲驅車上太行

別冠氏諸人

戊戌秋八月初三日

東舍茶渾酒味新
西城紅艷杏園春
衣冠會集今為盛

里社追隨分更親分手共傷千里別低眉常愧六年貧
他時細數平原客看到還鄉第幾人

入濟源寓舍

戊戌八月
二十二日

未辨驅車上太行主人留此避風霜遺編墜簡文章爛
糲食麤衣歲月長奮迅舊嫌扶老杖龍鍾今屬負暄墻
睡中刺刺聞人語季子金多過洛陽

鎮平縣齋感懷

四十頭顱半白生靜中身世兩關情書空咄咄知誰解

擊缶鳴鳴却自驚老計漸思乘款段壯懷空擬漫崢嶸
西窗一夕無人語挑盡寒燈坐不明

野菊再奉座主閑閑公命作

晚景蕭疎畫不成晚花作意出繁英鮮明獨向霜露見
爛熳却隨蒿艾生南國騷人知有待西風蝴蝶更多情
南山正在悠然處安得芳樽與細傾

五月十二日座主閑閑公諱日作

厝火誰能救已然直教憂疾送華顛贈官不暇如平日

草詔空傳似奉天故壘至今埋恨骨遺宗何力起新阡
門生白首渾無補陸氏莊荒又一年

四哀詩

李欽叔

赤縣神州坐陸沈金湯非粟禍侵尋當官避事平生恥
視死如歸社稷心文采是人知子重交朋無我與君深
悲來不待山陽笛一憶同衾淚滿襟

冀京父

先公藻鑑識終童曾拔崑山玉一峯不見連城沽白壁
蚤聞烈火燎黃琮重圍急變紛紛口九地忠魂耿耿胸
欲弔南雲無覓處士林能不泣相逢

李長源

冀都事死東州禍李翰林亡陝府兵方為騷人箋楚此
更禁書客墮秦坑石苞本不容孫楚黃祖安能貸禰衡
同甲四人三橫賈此身雖在亦堪驚

王仲澤

太學聲華弱冠馳青雲岐路九霄飛上前論事龍顏喜
幕下籌邊犬吠稀壯志相如頭碎柱赤心嵇紹血沾衣
從來聖牘褒忠義誰為幽魂一發輝

過詩人李長源故居

楚些招魂自往年明珠真見抵深淵巨鰲有餌雖堪釣
怒虎無情可重編千丈氣豪天也妬七言詩好世空傳
傷心鸚鵡洲邊淚却望西山一泫然

己亥十一月十三日雪晴夜半讀書山東龕看

月

四山寒雪夜深明未恨崔嵬失舊青青女有功加粉澤
素娥無意惜娉婷微雲河漢非人世太古鴻荒見典刑
剩著新詩記今夕年年來醉半山亭

明日作

晴光晃漾入危闌萬象都歸一色看搖筆尚堪凌浩蕩
舉杯誰與慰荒寒化成銀界清涼近散盡冰花碧海乾
後夜霜空月輪滿可無秦女共驂鸞

杏花二首

庚子歲
南庵賦

芳樹春融絳蠟凝
春風寂寞掩柴荆
畫眉盧女嬌無奈
鵲齒孫娘笑不成
已怕宿粧添蝶粉
更堪煖藥鬧蜂聲
一般疎影黃昏月
獨愛寒梅恐未平

一穗蘆鞭一穗塵
西園紅艷眼中新
帽簷分去家家喜
酒面飛來片片春
梅柳幾曾同故事
櫻桃纔得綴芳辰
荒城此日腸堪斷
老却探花筵上人

醉後

早歲披書手不停中年所得是忘形天公不禁人間酒
崔瑗虛留座右銘身後山丘幾春草醉來日月兩秋螢
柴門老雨青苔滿一醉狂歌且自聽

賦南中楊生玉泉墨

墨不用松煙
而用燈煤

萬竈玄珠一唾輕客卿新以玉泉名御團更覺香為累
冷劑休誇漆點成浣袖秦郎無藉在畫眉張遇可憐生
晴窗弄筆人今老孤負松風入硯聲

宮中以張遇扇香
小團為畫眉墨

贈張文舉御史

安穩藜床坐欲穿
合教絕學到真傳
清貧自苦知何負
神理無憑恐未然
麋乳尚憐孤竹餓
龍頭誰識管寧賢
無窮白日青天在
會有先生引鏡年

先生新
失明

寄答飛卿

一首新詩一紙書
喜於滄海得遺珠
古來獻玉猶難售
此日聞韶本不圖
白雪任教春事晚
青天終放月輪孤
并州命駕纔千里
嵇呂風流未可無

留別龍興汴禪師普照鑑禪師

十年不見木庵師二老相從又一時俚曲只知無白雪
遺音誰謂有朱絲書難盡信何如默人各為家枉自私
三月春風滿桃李青青留看歲寒枝

赤石谷

林罅陰崖霧杳冥石根寒溜玉玎玲雲來朔漠疑秋早
山近清涼覺地靈靜愛鳥聲存野調閑嫌人跡帶塵腥
南臺說有金銀氣可是并汾處士星

繫舟山僧徒謂之
小五臺九月中時

有景星如
佛光云

贈楊君美之子新甫

書林頭白坐吟呻，青佩橫經更幾人。
總角未逢韓吏部，伏膺先就楚靈均。
岳蓮盡發三峯秀，玉樹初臨二月春。
看取楊家伯，今年天壤姓名新。

憑亭同麻知幾賦

零落棲遲復此遊，一尊聊得散羈愁。
天圍平野莽無際，水遶孤城間不流。

元是深字知幾
請子改作間字

柳意漸迴淮浦暖，鴈

聲仍帶塞門秋。登高望遠令人起，欲買煙波無釣舟。

答公茂

文昌除目入驚看，似覺規摹到漢官。
冀北已空天下馬，江東全倚謝家安。
黃圖赤縣風流在，碧落銀河病眼寬。
林下升平有他日，草堂應許駐金鞍。

過應州

平野風埃接戍樓，邊城三月似窮秋。
人家土屋纔容膝，驛路旃車不斷頭。
隨俗未甘嘗馬湏，敵寒直欲御羊裘。
十年紫禁煙花繞，此日雲山是應州。

應州寶宮寺大殿

縹渺層簷鳳翼張
南山相望鬱蒼蒼
七重寶樹圍金界
十色雲華擁畫梁
竭國想從遼盛日
閱人真是魯靈光
請看孔釋誰消長
林廟而今草又荒

懷安道中寄懷曹徵君子玉

楮水歡游事已非
襄山回首重依依
義熙留在陶元亮
華表來歸丁令威
袖裏短書懷老筆
夢中皤腹見褒衣
祝君飽喫殘年飯
會有鄰牆白版扉

五月十一日檇軒老忌辰追懷

遺後交情老更傷每逢此日倍難忘
神光何處埋泉壤落月無言滿屋梁
祕閣圖書疑外府謝家蘭玉記諸郎
靈均謾倚騷經在宗國河山半夕陽

公墓今為亂塚
所迷故有上句

感事

富貴何曾潤髑髏直須浙米向矛頭
血餽此日逢三怨風鑒生平備九流
瓢飲不甘顏巷樂市鉗真有楚人憂
世間安得如川酒力士鎗頭醉死休

玉溪

瑞氏

邂逅詩翁得勝遊，煙霞真欲盡松丘。
玉溪如此不一到，今日曠然消百憂。
林影蒼茫開霽曉，岸容瀟灑帶新秋。
酒材已罄須君釀，要及西風入釣舟。

華不注山

濟南作

元氣遺形老更頑，孤峯直上玉孱顏。
龍頭突出海波沸，鰲足斷來天宇閒。
齊國霸圖殘照裏，謫仙詩興冷雲間。
乾坤一劍無人識，夜夜光芒北斗寒。

岳解元生日

邦猷

天日清明見岳時只君消得謫仙詩
鶯花到處供杯酒霜雪何緣點鬢絲
已辦紫雲新活計又添驥子好男兒
扶風里社他年看開簇靈椿桂五枝

感興

夜宿讀書山作

倚梯從昔望煙霄七葉何人竟珥貂
道路常教車歷鹿功名唯有鬢飄蕭
勤如韓子初無補晚似馮公豈見招
五十三年等閒裏一窗風葉雨潇潇

晨起

壬寅正月九日

燈火青燐語夜闌
柴荆寂寞掩春寒
歡悰已向杯中減
老態何堪鏡裏看
多病所須唯藥物
一錢不直是儒冠
掣鯨莫倚平生手
只有東溪把釣竿

時欲經營神
山別業故云

送周帥夢卿之闕中二首

狼籍麻衣見酒痕
憶君醉別柳邊村
離愁擾擾理還亂
來事悠悠誰與論
瘴海漸添春浪闊
冰崖唯覺暮烟屯
人間底似三峯好
箭筈通天有一門

風華漠漠水迢迢長記金鞍入灞橋鬚鬢而今滿霜雪
羽毛此日是雲霄火餘函谷青猶峙春動長陵紫未消
射虎南山付公等可能仙掌不相招

感事

舐痔歸來位望尊駸駸雷李入平吞飢蛇不計撐腸裂
老虎爭教有齒存神理定須償宿業債家猶足唬驚魂
且看含血曾誰嘆猪背關頭是鬼門

十月二十日雪中過石嶺關

老天黯慘入平蕪
朔吹崩奔萬竅呼
雪意旋粧行路景
詩家新有入關圖
地爐圍坐慚田父
絮帽衝寒怨僕夫
故國煙花重回首
蜀橙山麝記金壺

將上書革國幕府感懷呈賈明府

兵家世不乏小杜
風鑒今誰如老龐
自許竒謀傾幕府
不防幽夢落篷窗
驚鳥繞月枝難穩
羸驥嘶風氣未降
愛惜平生請纓手
一蓑休憶弄秋江

春寒

草木荒城屋數椽春寒閭巷益蕭然僮奴樵爨頭如葆
稚女跳梁履又穿白石鯉魚空尺半朱門食客自三千
松枝麈尾山中滿去去南華有內篇

即事

商紳因茲
兄從軍

逋客而今不屬官住山盟在未應寒書生本自無燕頤
造物何嘗戲鼠肝會最指天容我懶鴟夷盛酒盡君歡
到家慈母應相問為說將軍禮數寬

示懷祖

憔悴經年卧澗阿囊中無物只詩多自驚白鬢先潘岳
人笑藍衫似采和狗盜雞鳴皆有用鶴長鳬短果如何
乘閒便作歸田賦付與牛童扣角歌

示崔雷詩社諸人

一寸名腸心已灰十年長路夢初迴江山似許供詩筆
糜粥猶能到酒杯賣劔買牛真得計腰金騎鶴恐非才
游從肯結雞豚社便約歲時相往來

弘州贈曹文子玉

丘園舊憶詢幽仄，裘褐今聞識姓名。
故國衣冠有遺老，歲寒松柏見交情。
寄書千里空頭白，握手一杯俱眼明。
來往裏陰從此始，剝將歌笑慰生平。

和仁卿演太白詩意二首

蕭蕭窗竹動秋聲，紫極深居稱野情。
靜坐且留觀衆妙，還丹無用說長生。
風流五鳳樓前客，寂寞千秋身後名。
解道田家酒應熟，詩中只合愛淵明。

蕭蕭窗竹動秋聲，簷間白雲澹以成。
白雲朝飛本無意，

白雲暮歸如有情淵明太白醉復醉季主唐生鳴自鳴
四十九年堪一笑昨非今是可憐生

燕府白兔

仙穎迷離望莫攀爭教失脚下高寒吸殘灝露瑤窗曉
搗盡玄霜玉杵閒顧影乍疑雲外見寫生何似鏡中看
褐衣擾擾皆三窟幾在祥經咳唾間

梁都運亂後得故家所藏無盡藏詩卷見約題

詩同諸公賦

飛亭四望水雲寬
亭上高人杳莫攀
已就湖山攬奇秀
更教鄉社得安閒
風流豈落正始後
詩卷常留天地間
勝賞休言隔今昔
肩吾新自會稽還

出都二首

漢宮曾動伯鸞歌
事去英雄不奈何
但見觚稜上金爵
豈知荊棘卧銅駝
神仙不到秋風客
富貴空悲春夢婆
行過盧溝重回首
鳳城平日五雲多

歷歷興亡敗局碁
登臨疑夢復疑非
斷霞落日天無盡

老樹遺臺秋更悲，滄海忽驚龍穴露。
廣寒猶想鳳笙歸，從教盡剗瓊華了。
留在西山儘淚垂。

壽寧宮有瓊華島絕頂廣寒殿近為

黃冠輩所撤

癸卯望宿中霍道院

疊嶂沈沈轉素蟾，長松栩栩擁高簷。
湖山已為新晴好，風露還疑此夜添。
身外作緣良自苦，世間除睡更無甜。
溪堂借宿從今始，便約兒童具米鹽。

甲辰三月旦日以後雜詩三首

應接紛紛又浹旬枉教虛負杏園春尋芳自分無閒日
載酒寧知有故人花柳得時俱作態川原經雨更無塵
憑君莫惜尊前醉看即青梅入座新

澌澌猩紅鬧曉晴攢頭真似與春爭舒開楊柳聊相映
瘦殺寒梅枉自清粉艷低回工作態絳唇寂寞獨含情
畫圖只愛殘粧好未信徐郎解寫生

密霧輕塵細洒勻綠雲紅雪一番新風光爛熳供歡席
酒味清醇似主人落落湖山如有喜欣欣魚鳥亦相親

新詩寫入奚奴錦從此他鄉不算春

紫牡丹三首

金粉輕粘蝶翅勻
丹砂濃抹鶴翎新
儘饒姚魏知名早
未放黃徐下筆親
映日定應珠有淚
凌波長恐襪生塵
如何借得司花手
徧與人間作好春

夢裏華胥失玉京
小闌春事自昇平
只緣造物偏留意
須信凡花浪得名
蜀錦浪淘添色重
御爐風細覺香清
金刀一剪腸堪斷
綠鬢劉郎半白生

天上真妃玉鏡臺醉中遺下紫霞杯已從香國偏薰染
更惜花神巧剪裁微度麝薰時約畧驚移鸞影却低回
洗粧正要春風句寄謝詩人莫漫來

與同年敬鼎臣宿順天天寧僧舍

蕭蕭風雨打僧窗耿耿青燈對客床每恨相望隔關塞
豈知連日醉壺觴萍蘂味薄堪長久茅屋寒多且閉藏
三十餘年老兄弟此同情話獨難忘

贈答樂大舜咨

中京副
留守

舟車何地得通津書疏相忘意更親但愛柏臺推峭直
豈知梅賦更清新兩都秋色皆喬木耆舊風流有幾人
詩酒陪從約他日雞川已許濯纓塵

都運李文哀挽

有之

平日剛稜觸禍機老年天遣故鄉歸登車攬轡名空在
濯足臨流事已非白鶴會須尋舊約青蠅猶解避餘威
西州正有花千樹淚盡羊曇醉
後衣

李文哀於壬寅夏六月
異香滿室三日蠅不近

贈答郝經伯常伯常之大父子少日從之學科
舉

故家珠玉自成淵重覺英靈賦子偏文陣自憐吾已老
名場誰與子爭先撐腸正有五千卷下筆須論二百年
莫把青春等閒了蔡邕書籍待渠傳

呂國材家醉飲

世事悠悠殊未涯七年回首一長嗟虛傳庾信凌雲筆
無復張騫犯斗槎去國衣冠有今日春風桃李是誰家

螺臺剩有如川酒暫為紅塵拂簪華

洛陽

千年河岳控喉襟一日神州見陸沈已為操琴感哀涕
更須同輩夢秋金城頭大匠論蒸土地底中郎待摸金
擬就天公問翻復蒿萊丹碧果何心

過三鄉望女兒邨追懷溪南詩老章敬之二首
雲際虛瞻處士星案頭多負讀書螢筆端有口傳三篋
石上無禾養百齡從昔葛陂終變滅祇今韓嶽謾英靈

因君重為前朝惜枉破青衫買一經

女几山人
謂之韓蕤

萬山青繞一川斜好句真堪字字誇棄擲泥塗豈天意
折除時命是才華百錢卜肆成都市萬古詩壇子美家
欲就溪南問遺事不禁哀涕落煙霞

為鄧人作詩

再見州人本不期相留相挽忍相違攜盤渭水堪流涕
種柳金陵已合圍事去恍疑春夢過眼明還似故鄉歸
題詩未要題名字今是中原一布衣

贈張主簿偉

江岸墳荒草棘秋
朱陽南下重君憂
弓刀近塞人煙少
林壑經霜虎迹稠
究竟長途知有漸
激昂高義報無由
從今弟妹通家了
莫向瓜田認故侯

戒為究竟伴
能過險惡道

望盧氏西南熊耳嶺

不到中鄉十五年
忽驚行色是盧川
已占介福歸王母

未信羈魂似粵阡

柳文

時為顧存慚吏報

先夫人墓乳後
故吏輩歲時致

祭偶成期會殆天憐

馬范二師遠在千里外
予往盧氏皆得會面

荒林破屋

江聲裏坐想孤城一泫然

寄劉繼先

清霜茅屋耿無眠坐憶分攜一慨然
楚客登臨動歸興
謝公哀樂感中年淒涼古驛人煙外
迢遞荒山雪意邊
千樹春風水楊柳待君同繫晉溪船

寄楊弟正卿

馬迹車塵漫白頭蒼生初不待君憂
且從少傅論中隱
儘要元規擁上流東閣官梅動詩興
洞庭春色入新筍

歸程未覺西菴遠夜夜清溪繞石樓

正卿西菴以名酒
甲洛中嘗賦觀漲

詩有狂瀾竟逐西風落依舊
清溪繞石樓之句故兼及之

為鮮于彥魯賦十月菊

追錄

清霜浙浙散銀沙驚見芳叢開歲華
借暖定誰留翠被
鍊顏應自有丹砂秋香舊入騷人賦
晚節今傳好事家
不是西風苦留客
哀遲久已避梅花

贈答同年敬鼎臣

四海屏山放一頭爭教塵土走東州
長身奉米侏儒飽

束髮從軍妄尉侯
千首新詩工作祟
百壺清酒未消憂
悠悠世事今如此
付與煙波著釣舟

寄英上人

世事都銷酒半醺
已將度外置紛紛
乍賢乍佞誰為我
同病同憂只有君
白首共傷千里別
青山真得幾時分
相思後夜并州月
却為湯休賦碧雲

寄答仰山讌長老

梁住
招隱

木菴推出讌書記
乞與雲林百自由
想得驅驢入招隱

勝於騎鶴上揚州衆狙皆喜芋初熟一鳥不鳴山更幽
日暮王城市聲合松風亭上莫迴頭

九日登平定湧雲樓故基樓即閑閑公所建

詩翁曾此宴重陽老樹遺臺認醉鄉流水浮生幾今昔
高秋雲物自淒涼飛來野鶴聊堪喜望隔長鯨又可傷
賴是風流未全減白頭門客有王楊

時王無咎楊子昭
在生公在郡時學

生也

平定鵲山神應王廟

古柳輪囷欲十圍鵲山祠廟此遺基萬金良藥移造化
老眼天公誰耦時已為養生誣單豹不應遭網廢元龜
半生磊塊澆仍在擬問靈君乞上池

寄答商孟卿

窈渺朱絃寂寞心得詩何啻得南金冷猿挂夢山月暝
老鴈叫羣江渚深異縣五年仍隔濶荒城連日想登臨
書來且只平安了撥觸離愁恐不禁

答石子章因送其行

石梁詩好先知名，尊酒相逢意自傾。
寶劍沈埋惜元振，鐵檠豪宕見胡鉦。
藍田月出多重暈，豐嶺霜餘即大鳴。
後日天山望征騎，燕鴻歸處是雲程。

留別仲經

來時兒女拜燈前，此日壺觴是別筵。
聚散共知陰有數，笑談爭遣病相先。
秋風古道將誰語，殘月長庚更可憐。
雞柵魚梁一村落，若為還似浙江邊。

仲經方病中
故有上句

別周卿弟

晚歲論詩辱見收相從許久重相留苦心亦有孟東野
真賞誰如高蜀州萬疊寒雲度歸鴈孤洲春水澹沙鷗
荒城後日思君處風色蕭蕭人白頭

寄叔能兄

星斗龍門姓字新豈知書劍老風塵郎君未省曾開閣
王翰何緣得買鄰銀燭對談辭館夜雪梅同醉浙江春
祇應千里東州月處處相逢即故人

賀威卿徐弟得雄

利市金錢四座俱阿卿新喜到充閭跨牛楊朴空顛酒
秣驥王良已問途桂出孫枝知秀發鳳離丹嶠亦舒徐
明年別作飛黃句來賀君家第二雛

遺山集卷九

遺山集卷十

金 元好問 撰

七言律詩

追錄洛中舊作

樂府新聲綠綺裘
梁州舊曲錦纏頭
酒兵易壓愁城破
花影長隨日脚流
萬里青雲休自負
一莖白髮儘堪羞
人間只怨天公了
未便天公得自由

東園晚眺

東平

霜鬢蕭蕭試鑷看，怪來歌酒百無歡。
舊家人物今誰在，清鏡功名歲又殘。
楊柳攬春出新意，小梅留雪弄餘寒。
一詩不盡登臨興，落日東園獨倚欄。

十一月五日暫往西張

城隈細路入沙汀，絮帽衝風日再經。
歟歲材虛更荒惡，窮冬人影亦伶仃。
林煙漠漠鴉邊暗，山骨稜稜雪外青。
四十年來此寒苦，凍吟猶記隴關亭。

石嶺關書所見

軋軋旃車轉石槽故關猶復戍弓刀連營笑騎紅塵暗
微服行人細路高已化蟲沙休自歎厭逢豹虎欲安逃
青雲玉立三千丈元只東山意氣豪

陀羅峯二首

念念靈峯四十年一來真欲斷凡緣鑿開混沌露元氣
散布兜羅彌梵天雲卧無時不閒在樓居何處得超然
殊祥莫詫清涼傳會與茲山續後篇

每恨奇探負盛年松崖今喜入攀緣初驚靈鷲多飛石
更信金牛有漏天鄉國登臨乃如此名場馳逐亦徒然
留詩便與香泉約起本西游第一篇

僧行平陽
僧慧太原

追懷曹徵君

生死論交不易忘一回言別淚千行空勞結伴歸蓮社
無復題詩寄草堂楚國先賢宜有傳粵阡羈鬼謾思鄉
因君錯怨天公了且道今誰晚節昌

春日書懷呈劉濟川

鄉社荒殘住不成無端蓬蒿掩柴荆流年又見東風菜
樂土空懷北斗城父老只供留我醉兒童也喜從君行
周侯見說應相笑共隱三泉先有盟

東風菜見
本草菜部

晉溪

石磴雲松著色屏岸花汀草展江亭青瑤疊甃通懸甕
白玉雙龍掣迅霆地脈何嘗間今昔尾閭真解泄滄溟
乾坤一雨兵塵了好就川妃問乞靈

弔岳家千里駒

蜀客淒涼土一丘身亡還有化身愁
靈椿丹桂偶相值
蕙草清霜寧久留
掌中玉雪恩憐在
筆底雲煙取次休
過眼空華只如此
不如無子却無憂

七月十二日行狼牙嶺

狼牙路滑馬伶俚
老鶴超超欲上征
一曲松風寫幽致
九秋雲物愴離情
天開員嶠方壺境
澗落銀河月窟聲
覩面青山入渠手
定誰胸次玉崢嶸

十三日度岳嶺

神岳規模亦壯哉上階絕境重徘徊丹青萬木秋風老
金翠千峯落照開川路漸分猶暗澹湍聲已遠更淒哀
石門剝比靈丘遠正坐登臨欠一來

玉泉二首

神岳提封入寺基上公官秩見僧碑雲藏佛屋晴猶暗
樹近禪窗老更奇竹杖只供行險易藜床偏與望川宜
同時不及髯中令猶得泉名比鳳池

玉水泓澄古殿隅又新名第不關渠每因天日流金際

更憶風雷裂石初百里官壺分韻勝千人齋粥薦甘餘

八功德具休誇好玩景臺荒有破除

寺東北有玩景臺
盡得神川之勝導

者候引之荒山

一失故有二句

玄都觀桃花

前度劉郎復阮郎玄都觀裏醉紅芳
非關小雨能留客自是桃花要洗粧
人世難逢開口笑老夫聊發少年狂
一杯盡吸東風了明日新詩滿晉陽

贈張致遠

茅屋瀟瀟潁水濱
兩山相望即比鄰
禪房道院留連夜
酒榼詩囊浩蕩春
老鶴千年見城郭
徵君晚節旁風塵
相逢不盡平生意
耆舊風流有幾人

夜宿秋香亭有懷本菴英上人

兄弟論交四十年
相從旬日却無緣
去程冰雪詩仍在
晚節風塵私自憐
蓮社舊從元亮酒
藤溪多負子猷船
茅齋一夕愁多少
窗竹瀟瀟耿不眠

汴梁除夜

追錄

六街歌鼓待晨鐘
四壁寒齋只病翁
鬢雪得年應更白
燈花何喜也能紅
養生有論人空老
祖道無詩鬼亦窮
數日西園看車馬
一番桃李又春風

與馮呂飲秋香亭

二子皆吾友
之純席生

龐眉書客感秋蓬
更在京塵瀕洞中
莫對青山談世事
且將遠目送歸鴻
龍江文采今誰似
謂之純鳳翼
永寧地名年
光夢已空
剩著新詩記
今夕尊前四客一哀翁

哀武子告

生氣曾思作九原，迷塗爭得背南轅。
梁鴻故事要離墓，衛國孤兒祇樹園。
子今為僧舊說布衣甘絕脰，今傳史筆記。
歸元知君祿仕無心在，旌孝終當到李源。

贈李春卿

竇十郎家指顧間，因君我亦愛西山。
丹房藥鏡平生了，禪榻茶煙歲月閑。
春甕有情供白墮，秋風無力損紅顏。
重來已有明年約，剝破都城幾往還。

甲辰秋留別丹陽

疎疎衰柳映金溝
祖道都門復此留
千里關河動歸興
九秋雲物發詩愁
嚴城鐘鼓月清曉
老馬風沙人白頭
後夜相思渺何許
西山西畔是并州

龍興寺閣

全趙堂堂入望寬
九層飛觀儘高寒
空聞赤幟疑軍壘
真見金人泣露槃
桑海幾經塵劫壞
江山獨恨酒腸乾
詩家總道登臨好
試就遺臺老樹看

別緯文兄

玉壘浮雲變古今燕城名酒足浮沈眼中誰復承平舊
言外驚聞正始音異縣他鄉千里夢連枝同氣百年心
行期幾日休相問觸撥羈愁恐不禁

甯掾端甫北上

馬頭風雪遠相迎颯沓弓刀四十程自是青雲動高興
未甘白髮老諸生書來沙漠燈花喜夢到秦川煙樹平
長句送君還自愧半山已有鴈飛行

答定齋李兄

小山藜桂姓名香舉世何人得鴈行
滄海揚塵幾今昔長庚配月獨淒涼
虛勞裴相求白傳正倚源明識漫郎
十載相從未言晚城南泉石有雲莊

空山何巨川虛白菴二首

舊向韋編悟括囊肯隨文本被青黃
吉祥止處無餘物知見薰來有底香
空谷自能生地籟浮雲爭得翳天光
只愁八月風濤壯夢裏江聲撼客床

何臨
安人

露菊霜茱薦枕囊石泉崖蜜破松黃
只緣山遠無來客

更覺心清聞妙香
碁局儘堪消日晷
吟毫真合染溪光
劇談不盡江湖景
重與青燈約對床

聽姨女喬夫人鼓風入松

白雪朱絃一再行
春風纖指十三星
雲窗霧閣有今夕
寶靨羅裙無此聲
滿洒寒松度虛籟
悠颺飛絮攪青冥
胎仙不比湘靈瑟
五字錢郎莫漫驚

哭樊帥

自倚沈寃有舌存
爭教無路叩天閭
裝囊已竭千金賜

絕幕誰招萬里魂東道漫悲梁苑客南園多負壽張孫
春風花落歌聲在夢裏能來共酒尊

寒食

壬子清明後作

上苑春風盛物華天津雲錦赤城霞輕舟矮馬追隨遠
翠幙青旗笑語譁化國樓臺隔瀛海吳兒洲渚記仙家
山齋此日腸堪斷寂寞銅餅對杏花

送樊順之

弓刀十驛岳蓮州渭水秦山得意秋王粲從軍正年少

庾郎入幕更風流
寒鄉況味真雞肋
清鏡功名屬虎頭
寄謝溪風亭上月
老夫乘興欲西游

蜀昭烈廟

合散扶傷老益堅
荒祠重過為淒然
君臣洒落知無恨
庸蜀崎嶇亦可憐
一縣山陽堯故事
三年章武魏長編
錦宮羽葆今何處
半夜樓桑叫杜鵑

宿翠屏口

鬢鬚蒼白葛衣寬
事外閒身也屬官
授簡如聞數枚叔

乘車初不少馮驩沙城雨塌名空在石峽風來夏亦寒
兩飽三飢已旬日虛勞兒女勸加餐

王敦夫祥止庵

三樂人推二樂全有親可事子能傳舊時詩禮聞家學
此日丹砂見地仙蕩蕩天光虛室外融融和氣彩衣前
情知不羨燕山桂一樹靈椿歲八千

過寂通庵別陳丈

甲辰秋

陳丈未識某而愛其詩曾對高御史士美言我

他日見遺山當快飲百醉後見之而公已病乃
相約易百醉為百杯每見以酒籌計之至七八
十杯復有此別故詩中及之

心遠由來地自偏不離城市得林泉從教上界多官府
且放閒身作地仙三月有期何敢負百杯未滿會須填
違離更覺從公晚却望都門一慨然

梁移忠詩卷

一箭功成塞上歸迺翁垂白藉扶持燕雲義俠風流遠

里社陰功父老知龍種作駒原自異虎頭食肉未應遲

高門更與增華表丁令還家先有期

時都運夫已下世故詩中反之

喬千戶挽詩

高塚驚看石表新空將事業望麒麟燕遼部曲千夫長
楚漢風雲百戰身赤羽有神留絕藝素旗無誅記連姻
陰功未報天心在累將重侯又幾人

潘安仁楊使君妹有表之素旗之句

喬與子皆毛氏之壻

贈王仙翁道成

覽照休驚白髮新
奕棋翻覆見來頻
燕南趙北留詩卷
王後盧前盡故人
平地青雲一爐藥
舊都喬木百年身
憑君剩醉浮香酒

館名

梁苑而今不算春

常仲明教授挽辭

雲際虛瞻處士星
豈知談笑已忘形
鎮州肥膩無毫髮
晉產真淳有典刑
白帽枉教淹晚節
綠囊元擬濟含靈
汝南後日先賢傳
猶欠知幾為勒銘

常代州崞縣人客
邸城與知幾游從

知靈臨終
殊明了

追錄舊詩二首

短褐單衣長路塵十年回首一吟呻
孤居無著竟安往宿債未償今更新
相馬自甘齊客瘦食鮭誰顧庾郎貧
聞君話我才名在不道儒冠已悞身

自用韻答
張之純

潦倒聊為隴畝民一犁分得雨聲春
功名何物堪人老天地無心誰我貧
穎上雲煙隨處好洛陽桃李幾番新
悠悠世事休相問年麥今年晚得辛

用在懷
祖韻

丁未寒食歸自三泉

春山晴暖紫生煙山下分流百汊泉未故小桃裝野景
已看茅屋映秋千飢烏得食爭相喚醉叟行歌只自顛
寒食明年定何許故人尊酒且留連

即事呈邦瑞

鄭莊父子重相留似為良辰散客愁陋巷新成一茅屋
今年連醉雨中秋開尊便覺賢人近汙足寧論力士羞
明日燕臺傳盛事坐中賓客盡名流

和白樞判李定齋有詩寄白以因風何惜數行

書為落句白酬答云欲搜春草池塘句藥裏關
心夢不成余平解之

金粟崗頭有髮僧遙知默坐對龕燈書郵但覺浮沈久
詩卷何緣唱和曾白日放歌須縱酒清朝有味是無能
相逢定有池塘句藥裏關心恐未應

慶高評事八十之壽

圖畫堯民大樸存衣冠兼得見高門種松千歲如種德
教子一經今教孫化日舒長留暮景秋風搖落變春溫

聘君羔鴈休疑晚正及新年薦壽尊

超然王翁哀挽

直擬期頤薦壽尊却從圖畫記生存百年喬木衣冠古
一夕西庵笑語溫故事未霑通德里素風多負讀書孫
吳陳諸老今誰在滅沒歸鴻是薊門

大名贈答張簡之

營平豪宕變溫文所見今知勝所聞只道生涯無長物
爭教詩墨策奇勲伐薪未敢煩名士載酒能來過子雲

後日山陽養衰疾藥籠仙品正須君

燕都送馬郎中北上

功曹此日漢蕭何家世當年老伏波但愛紅蓮映芳渚
豈知寒谷變陽和珠囊不載模糊錦銀管先書茂異科
太史占天應有喜一星朝處五雲多

馬雲漢方鏡背有飛魚

劫火依然百鍊初護持元自有神魚影寒似覺雲屏透
光落應分玉斗餘開朗休嫌露圭角圓通寧復滯方隅

衣冠正了渾開在一片靈臺欲付渠

贈答鴈門劉仲修

并序

仲修省郎乘傳過新興有詩見及推激過稱甚
非哀謬所宜得者愧汗之餘輒用韻為謝仲修
詩律深密得於尊公鳳山老人過庭之訓且其
顏壯絕類吾友李從事長源故篇中有及

車騎雍容一生傾并州人物未凋零共知祭酒傳家學

劉向為劉
氏祭酒

獨愛中郎餘典刑東壁圖書欣有託南溟風

浪駭初經少微見比吾何敢洗眼仙槎候客星

餘慶堂

五年霜戟照康莊萬里春風擁畫梁已覺并汾增勝氣
更從王郝借餘光靈椿丹桂知難老玉節金符豈易量
剩著牋毫授辭客南堂兼是棣華堂

寄答劉生

西州消息到東山懷袖新詩百過看白壁明珠驚照座
朔雲寒雪入憑欄省郎共結交情厚野老還欣禮數寬

後日秋風一尊酒草堂應得駐金鞍

別董德卿

爛醉秋風四十場此回歌笑重難忘揚雄詞賦今誰識
陶令田園先已荒同甲弟兄雖異姓宦游州郡即吾鄉
懸知後日登高地剩為行人望太行

送端甫西行

瀛洲人物早知名車騎雍容一座傾美酒清歌良有味
綠波春草若為情渭城朝雨三年別平地青雲萬里程

老我秦游舊曾約夢中仙掌已相迎

讀李狀元朝宗禪林記并序

李守濟州城破不屈節死贈鄉郡刺史

偶向禪林見舊文濟陽南望為沾巾張巡許遠古亦少
烈日秋霜今更新千字豐碑誰國手百城降虜盡王臣
知君不假科名重元是中朝第一人

同嚴公子大用東園賞梅

東閣官梅要洗粧青雲公子不相忘翰林風月三千首

樂府金釵十二行佳節屢從愁裏過老夫聊發少年狂
花行更比梳行好誰道并州是故鄉

中庸先生垂示先大夫教子詩及裴內翰擇之
所述家傳愛仰不足情見於辭

嚴訓常如天日照名家元自古今同只知楊秉餘清節
爭信譙玄有素風

獨行傳
第一人

通德里門傳故事安平韻語

到兒童青青留在懷賢樹愛殺曹南一畝宮

賀中庸老再被恩綸

萬古千秋麗澤堂紫泥恩詔姓名香
治朝例有高年敬
神理終歸晚節昌
東魯儒生傳舊學
曹南方志發幽光
季春羔鴈秋風酒
准擬年年薦壽觴

趙汲古南園

分得
軍字

林園近與六街鄰
塵漲都歸一水分
魚樂定從濠上得
竹香偏向雨中聞
接籬倒著容山簡
老屋高眠稱陸雲
尊酒相陪有今日
却慚詩墨不能軍

柳亭雨夕與高御史夜話

關塞無緣笑語同偶然情話此從容青天蜀道不得過
山色歸心空自濃九日茱萸藍澗酒十年朝馬景陽鐘
三間老屋知何處惆悵雲間陸士龍

高曾自藍田令入
拜監察御史北渡

後謀還保塞而困於
無資者二十年矣

玉峯魏文哀挽

風馭翩翩渺獨征幾人終始復哀榮祇緣大事存遺稿
重為斯文惜主盟北斗泰山初未減秋霜烈日凜如生
莫疑知己無從報直筆君看戮進明

清明日改葬阿辛

掌上青紅記點粧今朝哀感重難忘金環去作誰家夢
綵勝空期某氏郎一瞥風花纔過眼百年冰蘖若為腸
孟郊老作枯柴立可待吟詩哭杏殤

寄謝常君卿

百過新篇卷又披得君重恨十年遲文除嶺外初無例
詩學江西又一奇楊柳不隨春事老貞松惟有歲寒知
仙鄉白鳳瀛洲近洗眼雲霄看後期

送武誠之往漢陂

太原酒政瑞甫之
父北時為黃冠

行李中春發晉溪離筵辭客賦新題青雲有路人看老
秋水無言物自齊杜曲舊遊頻入夢兵厨佳釀惜分攜
因君為向蓮峯道不待移文我亦西

送劉子東遊

劉郎世舊出雄邊生長幽并氣質全陣馬風檣見豪舉
雪車冰柱得真傳書空咄咄知誰解擊缶鳴鳴頗自憐
後日東州飽歸載且休多送酒家錢

甲寅九日同臨漳提領王明之鹿泉令張奉先
賈千戶令春李進之冀衡甫遊龍泉寺僧顯求
詩二首

遠水寒煙接戍樓
黃花白酒浣羈愁
霜林染出雲錦爛
春色併歸風露秋
鄉社歲時容客醉
石墻名姓為僧留
登高舊說龍山好
從此龍泉是勝遊

柿葉殷紅松葉青
黃花霜後獨鮮明
西風浩浩欲吹帽
石溜泠泠堪濯纓
皇統貞元見題字
良辰美景記升平

何人解得登臨意，滅沒疎雲鴈一聲。

十日作

關樹蕭條返照明，并陘西北算歸程。
青黃大似溝中斷，文字空傳海內名。
平地煙霄遽如許，秋風茅屋可憐生。
重陽擬作登高賦，一片傷心畫不成。

贈答普安師

入座臺山景趣新，因君鄉國重情親。
金芝三秀詩壇瑞，寶樹千花佛界春。
聞道舊傳言外意，忘年今得眼中人。

種蓮結社風流在會向藍輿認後身

孝純宛丘遷奉

張弟新來第二雛聞其玉雪可念因以字之

鬢毛衰颯面塵埃孝子牽車古所哀千里長河限南北
一丘寒土見蒿萊遼東華表何人在柳氏玄堂此日開
十月知君有新喜小雛先與喚迎來

曹壽之平水之行

關塞相望首重搔相逢衰颯歎顛毛驪珠可忍輕彈雀
鶻餌何緣得釣鰲從昔丘園昌晚節向來山岳總秋毫

西風先有龍門約共舉一杯持兩螯

追懷趙介叔

今古人門各一時燕南剝有桂林枝清風明月懷元度
綠水紅蓮見杲之善政傳歸遺愛頌陰功留在稱家兒
哀歌不盡平生意空想翛然瘦鶴姿

追懷友生石裕卿

人物休評第幾流依然豪俠數并州壯懷歌闕尊為破
連句才多筆不休金馬只教聊避世玉犀誰遣失封侯

酒酣握手今無復惆悵西園是舊游

挽鴈門劉克明

詩骨嶄然野鶴孤
兩年清坐記圍爐
金初宋季聞遺事
草靡波流見古儒
已分幽人嗟古柏
爭教孺子莫生芻
鳳山後日先賢傳
再有劉宗祭酒無

贈答平陽仇舜臣

兩辱攜詩過草堂
曹君師席有輝光
飛騰自是功名具
潦倒何堪翰墨場
滄海驪珠能幾見
鄴城龍劍不終藏

太行殘雪春風近且趁梅花薦壽觴

仇乃曹益
大門生也

賈漕東城中隱堂

智水仁山德有鄰
柳塘花塢靜無塵
家僮解誦閑居賦
田父爭持社甕春
安吉總輸中隱士
典刑真見老成人
明年恰入非熊運
共看青蒲裏畫輪

約嚴侯汎舟

風物當年小洞庭
西湖此日展江亭
詩貪勝概題難徧
酒怯清秋醉易醒
白鳥無心自來去
紅渠照影亦娉婷

仙舟共載平生事未分枯槎是客星

送李同年德之歸洛西二首

千佛名經有幾人棲遲零落轉情親承平盛集今無復
哀樂中年語最真衣上緇塵元自化鏡中白髮為誰新
水南水北相逢在剝醉醺醺十日春

亡奈流光冉冉何逢君聊得慰蹉跎飛黃老去空奇骨
拙燕歸來只舊窠舉世盡從愁裏過一尊獨愛醉時歌
洛中定有人相問休道今年白髮多

贈蕭漢傑

并序

蕭漢傑大興人金國初嘗賜姓鄂囉氏故時人
又謂之鄂囉漢傑父仲寬居之飛龍榜登科同
知青州軍州事致仕有子六人皆使宦學獨漢
傑不樂去聲遂作舉子為人慷慨有志膽好讀書
古兵法及陰陽孤虛祿命之術從軍二十年積
官從三品領虢州倅關陝總帥府提控佩金符
蓋自燕城圍解之後間關南渡出入行陣間瀕

於死者屢矣鐵嶺之潰復入陝州陝州亂羣不
逞輩繫漢傑獄中漢傑乘昏暮破械而出懼為
追者及駕浮壺亂黃流筋疲力涸僅達北岸為
失侯故將者又二十年流離頓踏人所不能而
意氣都不少哀以人情觀之豈碌碌者所可辦
耶壬子冬與予相值於東原問其世知其為故
人大鈞之同母也問其日事則曰止以唐生李
主之業游時貴間耳因與諭余之行年而有契

於余心者私竊慨歎以為倚伏叵測哀與樂相
尋生也有涯而局於憂畏浩浩乎如乘舟而遇
風波非知其亡可奈何而安之其可以收利涉
之功乎漢傑為有得矣其別也因為長句以贈
射虎將軍右北平短衣憔悴宿長亭雷轟寶劍無留迹
火借青囊為乞靈四壁不知貧作崇一瓢誰識醉中醒
相逢莫話槽機石自省枯槎是客星

送曹幹臣

和林音驛日懷思燕市歌歡有此時老我真成鐵爐步
感君時送草堂貲黃楊舊厄三年閨赤驥非無萬里姿
平地煙霄付公等不妨閑和鳳池詩

國醫王澤民詩卷

萬古君家父事兄豈知哀俗有王卿一篇華袞中書筆
滿紙清風月旦評鴻鴈自分先後序鵲鴿兼有急難情
閨門雍睦君須記方伎成名恐未平

祖唐臣母挽章

白髮承平一夢過，怡然冠帔見慈和。
肩輿燕喜今無復，手綫留殘恨更多。
舍肉已甘非穎谷，學仙何敢望西河。
升堂結友平生事，重為王君廢蓼莪。

丙辰九月二十六日挈家游龍泉

風色澄鮮稱野情，居僧聞客喜相迎。
藤垂石磴雲添潤，泉漱山根玉有聲。
庭樹老於臨濟寺，霜林渾是漢家營。
明年此日知何處，莫惜題詩記姓名。

感寓

南楊北李閒中老樂丈張兄病且貧叔夜呂安誰命駕
牧童田父實為鄰功名富貴知何物風雨塵埃惜此身
歌酒逢場暫陶寫不應嫌我醉時真

李仁卿楊正卿
樂舜咨張緯文

存歿

辛老敬之
劉兄景元

行間楊趙提衡早老去辛劉入夢頻案上酒杯聊自慰
袖中詩卷欲誰親兩都秋色皆喬木一代名家不數人
汲冢遺編要完補可能虛負百年身

人日有懷愚齋張兄緯文

書來聊得慰懷思
清鏡平明見白髭
明月高樓燕市酒
梅花人日草堂詩
風光流轉何多態
兒女青紅又一時
澗底孤松二千尺
殷勤留看歲寒枝

趙元德御史兄七秩之壽

富貴浮雲世態新
典刑依舊老成人
松身鶴骨詩千狀
玉潤冰清德有鄰
已卜新居近泉石
不應晚節傍風塵
平頭七十從頭數
才是梅溪第一春

張村杏花

丁巳二月初二日

昨日櫻唇絳蠟痕
今朝紅袖已迎門
只應芳樹知人意
留著殘粧伴酒樽
穠李尚須羞粉艷
寒梅空自怨黃昏
詩家元白無今古
從此張村即趙村



遺山集卷十



總校官庶吉士 張能照

校對官編修 臣 閔惇大

膳錄監生 臣 吳魯田

欽定四庫全書薈要

集部

遺山集卷十一

二



詳校官助教臣謝登雋

遺山集卷十一

金 元好問 撰

五言絕句

洛陽高少府渥陽後庵五首

溪上弄明月風露發新警
心空無一塵萬竹掃秋影
一水隨人意疏畦復芋溝
風波河洛近莫放出山流
韭早春先綠菰肥秋未黃
殷勤繞畦水終日為君忙



地僻境逾靜林疎秋已分清溪一片月修竹四山雲
方外人長樂山中物自幽百年梅福隱萬古謫仙游

內鄉雜詩

犬吠桃源近鶯聲柳巷深蒼苔留醉卧青竹伴幽尋

薛明府去思口號七首

能吏尋常見公廉第一難只從明府到人信有清官
畫諾由官長昂頭顧吏頻只從明府到判筆不傳神
麋鹿山中盡公厨破幾錢只從明府到獵戶得安眠

木索人何罪，累累滿獄中。只從明府到牢戶，二年空
驛舍。無歌酒清談了，送迎即看明府去。畫鼓有新聲，
舊日逃亡屋。鎌鉏色色新，即看明府去。還作賣牛人，
疾惡看平日。天然御史材，豪姦休鼓舞。驄馬即西來，

山居雜詩六首

瘦竹藤斜挂，幽花草亂生。林高風有態，苔滑水無聲。
石潤雲先動，橋平水漸過。野陰添晚重，山意向秋多。
樹合秋聲滿，村荒暮景閒。虹收仍白雨，雲動忽青山。

川迥楓林散山深竹港幽疎煙沈去鳥落日送歸牛
漲落沙痕出堤摧岸口斜斷橋堆聚沫高樹閣浮槎
鷺影兼秋靜蟬聲帶晚涼陂長留積水川濶盡斜陽

梁父吟扇頭

孔明箕踞坐大石上望月作梁父吟

槃礴萬古心塊石入危坐青天一明月孤唱誰與和
南樓月夕望鳳山有懷武鍊師子和

相望不相見山中君得知南樓今夜月已到洗參池

辛亥寒食

寒食年年好今年迥不同
秋千與花影併在月明中

山中晚春

雲光金碧聚林煙
綵翠新山花發較晚今年兩見春

得緯文兄書

鵲語喜復喜山城誰與娛
青燈一杯酒千里故人書

乙巳九月二十八日作

關山小雪後絮帽北風前
殘月如新月今年老去年

六言絕句

定齋兄寫真

朱黃筆底三篋白黑胷中兩基畫作蕭然野服雲龍蔽
日駸駸

巨然秋山為鄧州相公賦

筆端游戲三昧物外平生往還為問阿師何在白雲依
舊青山

德和墨竹扇頭

靜裏離離新粉動時細細清香明月清風自在紅塵白

日何妨

嫩香新粉墨離
離李長吉竹詩

曹得一扇頭

機中秦女仙去月底梅花晚開只見一枝疎影不知何處香來

唐子達扇頭

溪光冷於冰山骨淨如玉白雲自老人自閒莫遣秋風破茅屋

七言絕句

論詩三十首

丁丑歲
三鄉作

漢謠魏什久紛紜正體無人與細論誰是詩中疏鑿手
暫教涇渭各清渾

曹劉坐嘯虎生風四海無人角兩雄可惜并州劉越石
不教橫槊建安中

鄴下風流在晉多壯懷猶見鐵壺歌風雲若恨張華少

溫李新聲奈爾何

鍾嶸評張華詩恨其
兒女情多風雲氣少

一語天然萬古新豪華落盡見真淳南窗白日羲皇上

未害淵明是晉人

柳子厚晉之謝靈運
陶淵明唐之白樂天

縱橫詩筆見高情何物能澆魂磊平老阮不狂誰會得
出門一笑大江橫

心畫心聲總失真文章仍復見為人高情千古閑居賦
爭信安仁拜路塵

慷慨歌謠絕不傳穹廬一曲本天然中州萬古英雄氣
也到陰山敕勒川

沈宋橫馳翰墨場風流初不廢齊梁論功若准平吳例

合著黃金鑄子昂

關靡誇多費覽觀陸文猶恨冗於潘心聲只要傳心了

布穀瀾翻可是難

陸無而潘淨
語見世說

排比鋪張特一途藩籬如此亦區區少陵自有連城壁

爭奈微之識碣砭

事見元稹
子美墓誌

眼處心生句自神暗中摸索總非真畫圖臨出秦川景
親到長安有幾人

望帝春心託杜鵑佳人錦瑟怨華年詩家總愛西崑好

獨恨無人作鄭箋

萬古文章有坦途縱橫誰似玉川盧真書不入今人眼
兒輩從教鬼畫符

出處殊途聽所安山林何得賤衣冠華歆一擲金隨重
大是渠儂被眼謾

筆底銀河落九天何曾憔悴飯山前世間東抹西塗手
枉著書生待魯連

切切秋蟲萬古情燈前山鬼淚縱橫鑑湖春好無人賦

岸夾桃花錦浪生

切響浮聲發巧深
研摩雖苦果何心
浪翁水樂無宮徵

自是雲山韶濩音

水樂次山事又其欬乃曲云停恍
靜聽曲中意好是雲山韶濩音

東野窮愁死不休
高天厚地一詩囚
江山萬古潮陽筆
合在元龍百尺樓

萬古幽人在澗阿
百年孤憤竟如何
無人說與天隨子
春草輸羸枝幾多

天隨子詩無多樂草在南榮合有新
苗次第生稚子不知名品上恐隨春

草闕
新羸

謝客風容映古今
發源誰似柳州深
朱絃一拂遺音在
却是當年寂寞心

窘步相仍死不前
唱酬無復見前賢
縱橫正有凌雲筆
俯仰隨人亦可憐

竒外無竒更出竒
一波纔動萬波隨
只知詩到蘇黃盡
滄海橫流却是誰

曲學虛荒小說欺
俳諧怒罵豈詩宜
今人合笑古人拙
除却雅言都不知

有情芍藥含春淚無力薔薇臥晚枝拈出退之山石句
始知渠是女郎詩

亂後玄都失故基看花詩在只堪悲劉郎也是人間客
枉向春風怨兔葵

金入洪鑪不厭頻精真那計受纖塵蘇門果有忠臣在
肯放坡詩百態新

百年纔覺古風迴元祐諸人次第來諱學金陵猶有說
竟將何罪廢歐梅

古雅難將子美親精純全失義山真論詩寧下涪翁拜
未作江西社裏人

池塘春草謝家春萬古千秋五字新傳語閉門陳正字
可憐無補費精神

撼樹蚍蜉自覺狂書生技癢愛論量老來留得詩千首
却被何人校短長

文湖州草蟲為劉使君賦

造物無心筆有神翩翩飛動百年新蟲魚瑣細君休笑

學會屠龍老却人

京都元夕

袿服華粧著處逢六街燈火鬧兒童長衫我亦何為者
也在游人笑語中

西園

百草千花雨氣新今朝陌上有游塵皇州春色濃於酒
醉殺西園歌舞人

藍采和像

長板高歌本不狂
兒曹自為百錢忙
幾時逢著藍衫老
同向春風舞一場

鴛鴦扇頭

雙宿雙飛百自由
人間無物比風流
若教解語終須問
有底愁來也白頭

杏花雜詩十三首

杏花牆外一枝橫
半面宮粧出曉晴
看盡春風不同首
寶兒原自太愁生

露華浥浥泛晴光睡足東風倚綠窗
試遣紅粧映銀燭
湘桃爭合伴仙郎

娟娟纖條映酒船綠嬌紅小不勝憐
長年自笑情緣在
猶要春風慰眼前

暖日園林可散愁每逢花處儘遲留
青旗知是誰家酒
一片春風出樹頭

紛紛紅紫不勝稠爭得春光競出頭
却是梨花高一著
隨宜梳洗儘風流

露浥清華粉自添
隔溪遙見玉簾苫
眼看桃李飄零盡
更揀繁枝插帽簷

小橋南北夢幽尋
殘醉青騰不易禁
一樹杏花春寂寞
惡風吹折五更心

西山漠漠有無中
幾日園林幾樹紅
燕子銜將春色去
錯教人恨五更風

屈指殘春有別期
春風爭忍片紅飛
若為釀得千日酒
醉著東君不放歸

楚客離魂不易招
野春平碧水迢迢
垂楊也被多情惱
瘦損春風十萬條

小雨班班曉未勻
煙光水色畫難真
西園春物知多少
一樹垂楊惱殺人

魏紫姚黃有重名
洛陽車馬鬧清明
吹殘桃李風纔定
可是東君別有情

紅粧翠蓋惜風流
春動香生不自由
吳句芒齊厭閑冷

小詩作錦纏頭

此詩作錦纏頭
清江雜錄云
此詩作錦纏頭
清江雜錄云

出京

巫峽歸雲底處尋
高城渺渺暮煙沈
春風不剪垂楊斷
繫盡行人北望心

惠崇蘆鴈三首

寒沙折葦靜相依
故國春風早晚歸
意外羈棲誰畫得
羽毛單薄稻梁微

鴈奴辛苦候寒更
夢破黃蘆雪打聲
休道畫工心獨苦
題詩人也白頭生

江湖牢落太愁人同是天涯萬里身不似畫屏金孔雀
離離花影淡生春

早起

北舍南鄰獨樂聲袂衣晨起覺秋清豆田欲熟朝朝雨
喚殺雙鳩不肯晴

書生

書生千古一蠶腸蓋世功名不自償更笑登封武明府
兩盂白粥半生忙

銅雀臺瓦硯

愛惜鉛花洗又看
畫欄桂樹雨聲寒
千年不作鴛鴦去
喚得書生笑老瞞

步虛詞三首

後二首三
鄉時作

閨苑仙人白錦袍
海山宮闕醉蟠桃
三更月底鸞聲急
萬里風頭鶴背高

萬神朝罷出通明
和氣歡聲滿玉京
見說人間有新異
綠章封事謝升平

琪樹明霞碧落宮
歌音嫋嫋度冷風
人間聽得霓裳慣
猶恐鈞天是夢中

拙菴為溫甫賦

毫端棘末幾人爭
愚智相懸賦分平
畢竟世間誰是巧
鬢毛愁白可憐生

風雨停舟圖

老木高風作意狂
青山和雨入微茫
畫圖喚起扁舟夢
一夜江聲撼客床

納涼張氏庄二首

小橋深竹午風便一道垂楊帶亂蟬
山下行人遮日去却從茅屋問瓜田

樹陰環合水縈回樹下行人坐綠苔
絕似藁蒙山下路

眼中惟欠繫舟嵬

藁蒙繫舟皆鄉中山鄉人謂之繫舟嵬

送窮

日吉時良利動遷可能顏巷卜終焉
主人不倦星奴倦
辛苦年年縛草船

楊柳

楊柳青青溝水流鶯兒調舌弄嬌柔
桃花記得題詩客
斜倚春風笑不休

梁縣道中

青山簇簇樹重重人在春雲浩蕩中
也是杏花無意況
一枝臨水卧殘紅

自題寫真二首

山林日月老潛夫骨入重泉未擬枯
幽澗有冰含太古

無人和玉試洪鑪

張韓雖沒泉
壤尸且不朽

一派春煙澹不收
漁家已許借扁舟
山林且漫蹉跎去
莫問人間第幾流

再題

高談世事真何者
多竊時名亦偶然
山鹿野麋君自看
擬從何地著貂蟬

吳子英家靈照圖二首

船入西江萬有空
漉籬活計百錢功
阿靈了却無生話

想得蕭然似卷中

抱犢山高記洛川寸腸西去似繩牽而今恰羨龐家好

兒女生來只眼前

時女屢在盧氏
約歸寧未至

劉鄧州家聚鴨圖

沙浦空明洲景微
枯荷折葦澹相依
若為化作江鷗去
拍拍隨君貼水飛

戊子正月晦日內鄉西城遊眺

雄蜂雌蝶為花狂
陌上遊人醉幾場
前日少年今白髮

却來閑處看春忙

長壽山居元夕

微茫燈火共荒村黃葉漫山雪擁門
三十九年何限事只留孤影伴黃昏

聞仲澤丁內艱

升堂未幾訃音聞凶服哀羸日念君
昨夜東南雷雨惡遙知號哭遶新墳

贈眼醫武濟川

世眼紛紛昧是非不應刮膜在金鎰知君聖處工夫到
且道心盲作麼醫

賦粹中師竹拂子

了却香嚴一繫緣滿梳華髮伴談玄誰知拂月披風意
已具鈴鉦未落前

題伊陽楊氏戲虎圖

大班哆笑口侵耳小班蓄縮如乞憐戲鬪真成兩勍敵
發機誰在下莊前

王子端內翰山水同屏山賦二詩

鄭虔三絕舊知名付與時人分
重輕遼海東南天一柱
宵中誰比玉崢嶸

萬里承平一夢間
風流人物與江山
眼明今日題詩處
却見明昌玉笋班

右司正之家渭川千畝圖二首

官街塵土霧中天
入眼荒寒一灑然
大似終南山下看
北風和雪捲蒼煙

老眼蕭郎筆有神
岩姿洲景盡天真
情知一段幽閒趣
不必清談著晉人

同希顏欽叔玉華谷分韻得軍華二字二首

並山一逕入秋雲
草樹低迷方可分
開道無煩謝康樂

挽彊須得李將軍

時有虎害
故戲云

深山水木湛清華
興到窮探亦未涯
轉石猶能起雷雨

題詩自合動煙霞

轉石
當日

同希顏欽叔玉華谷還會善寺即事二首

高風捲盡四山雲，泉石煙霞得細分。
大是山靈設清供，惜無佳句答殷勤。

詩翁徹骨愛煙霞，別似劉君住玉華。
鐵笛不曾從二草，

頭巾久已挂三花。

趙隱芝子端同年進士，令任城為猾吏，所誣遂隱居。今年八十餘，自言胎

仙已成，不久去世云。

從鄧州相公覓酒時，在鎮平

寒日山城雪四圍，空齋孤坐意多違。
江洲未覺風流減，可使陶潛望白衣。

鎮平寄姪孫伯安筆

隆顙犀角掌中珠不見經年日念渠領取阿翁郎管筆
試教學寫問安書

黃荃龜藏六圖為張左丞賦

無心舒卷付皇天不幸剗腸亦偶然世上疑謀待君決
可能藏六便安全

鎮平書事

勸農冠蓋已歸休了却道懸百不憂可是諸人哀老子

半窗紅日擁黃綢

自鎮平暫往秋林道中寄家

風雨塵埃了半生
西山歸去眼增明
浮雲夫壻今如此
莫遣迎門有歎聲

超化

秋風嫋嫋入僧窗
盡得諸山草木香
却恨大梁三日醉
不來超化作重陽

又云擬借扁舟弄秋水
自嫌塵土浣沙鷗餘不記

山居二首

斜陽高樹挂晴虹
肅肅微涼雨氣中
一道鷺鷥花不斷
密香吹滿馬頭風

詩腸搜苦怯茶甌
信手拈書却枕頭
簷溜滴殘山院靜
碧花紅穗媚涼秋

寄女嚴三首

鵲崖魚窟路間關
旬月無由一往還
寒食歸寧見鄰女

舉家迴首望西山

鵲崖魚窟在內鄉往虛氏道中

添丁學語巧於絃
詩句無人為口傳
竹馬幾時迎阿姊

五更教誦木蘭篇

眼前兒女最關情
不見經年百感并
聞道全家解禪理
擬從香火問無生

自鄧州幕府暫歸秋林

升斗微官不療飢
中林春雨蕨芽肥
歸來應被青山笑
可惜緇塵染素衣

無題二首

七十鴛鴦五十絃
酒薰花柳動春煙
人間只道黃金貴

不問天公買少年

春風也解惜多才嫁與桃花不用媒
死恨天台老劉阮
人間何戀却歸來

題省掾劉德潤家驂鸞圖并為同舍郎劉長卿
記異劉在方城先有碧簫之遇如芙蓉城事云
千劫情緣萬古期樓中蕭史姓名非洞天
花落秋雲冷
腸斷青鸞獨自飛

希顏挽詩五首

官銜寥落在銘旌才命寧論重與輕不作漢家賢傳去

空勞明主識蕭生

漁馬溪漢旌紀寂寞
魏書隱逸傳中語

山立揚休七尺身紫髯落落照青春從教不入麒麟畫
猶是中朝第一人

人間無路問天公自古才難更阮窮日月不為千載計
江山長惜萬夫雄

萬古文章有正傳騁騶爭道望君先傷心一入重泉後
再得斯人又幾年

一世龍門屬李膺待君提拂遂騰升千年荆棘龜趺在
會有人尋下馬陵

出鄧州

本無奇骨負功名取次誰教髀肉生未到白頭能幾日
六年留滯鄧州城

過希顏故居四首

缺壺聲裏短歌行星斗闌干醉膽橫虎視鷹揚何處在
道邊孤冢可憐生

鶴蓋成陰著處同一時人物酒杯中臣門如市心如

世俗論

平聲

量恐未公

暮去朝來萬化途飛揚跋扈亦區區劇談不盡平生意
能有精微入夢無

把臂論交分最深三夫成虎古猶今百年惟有區區在
地下纔應識此心

雜著九首

萬期流轉不須史物物觀來定有無玉席紙衣同一盡

枉將白骨計榮枯

鳬短何如鶴有餘
非魚誰謂子知魚
一枝莫作鷓鴣看
水擊三千不羨渠

太虛空裏一遊塵
造物雖工未易貧
臧獲古來多鼎食
可能夷叔是飢人

青蓋朝來帝座新
豈知衛瓘是忠臣
洛陽荊棘千年後
愁絕銅駝陌上人

六國孱王走下風
神人鞭血海波紅
無端一片云亭石

殺盡蒼生有底功

天上河源地上流
黃金浮世等閑休
埋愁不著重泉底
儘向人間種白頭

泗水龍歸海縣空
朱三王八竟言功
圍碁局上猪奴戲
可是乾坤闕兩雄

昨日東周今日秦
咸陽煙火洛陽塵
百年蟻穴蜂衙裏
笑煞崑崙頂上人

半紙虛名百戰身
轉頭高塚卧麒麟
山間曾見漁樵說

辛苦凌煙閣上人

戚夫人

鴻鵠冥冥四海飛
戚夫人舞淚霑衣
無端恨殺商山老
剛出山來管是非

題山谷小艷詩

法秀無端會熱謾
笑談真作勸淫看
只消一句修修利
李下何妨也整冠

家山歸夢圖三首

別却并州已六年
眼中歸路直於弦
春晴門巷桑榆綠
猶記騎驢掠社錢

繫舟南北暮雲平
落日潯河一線明
萬里秋風吹布袖
清暉亭上倚新晴

游騎北來塵滿城
月明空照漢家營
巷中正有家山在
一片傷心畫不成

四皓圖

身墮安車厚幣中
白頭塵土浣西風
當時且不山間老

羽翼區區有底功

雜著

老優慣著沐猴冠却笑傍人被眼謾造物若留殘喘在
我儂試舞你儂看

遺山集卷十一